

四庫全書

史部

欽定四庫全書

建炎以來繫年要錄卷四十六

宋 李心傳 撰

紹興元年秋七月乙未朔劉光世以枯稭生穗為瑞奏
之上曰歲豐人不乏食朝得賢輔佐軍中有十萬鐵騎
乃可為瑞此外不足信朕在潛邸時梁間有芝草府官
皆欲上聞朕手自碎之不欲主此竒怪事輔臣歎服

臣留

正等曰天人之際相與至密國家將有失道之敗則有
災異以為之譴告然則政教之修明中和之決洽亦豈

無符瑞以示其嘉祥乎然而古人于灾異則深警懼之符瑞則重黜絕之何哉知其有灾異則戒信其為符瑞則急人之常情也去其怠而謹其戒則所益不知其幾何不然則徒以自慢而已奚益哉此春秋所以記異不記瑞而柳宗元正符所以謂不于其天于其人也太上皇帝屢闕祥瑞之說至此乃以朝廷有賢輔鐵騎為言豈非所以示其重黜絕之意與龜鑑曰其於奉天也深思政事以盡畏天之誠靜生內省以求答天之意孳出井度則深以天下為憂癸未風雷則深以敵人為慮久雨則詔求言大雪則詔決獄枯枯之生可稱也吾瑞鐵騎而不瑞枯枯麟鳳之獻可喜也吾寶賢能不寶麟鳳獻芝草則斥獻甘露則貶於是而無喜祥瑞惡變異之失

詔權湖南招捉公事馬友補正拱衛大夫成州

團練使權荆湖東路副總管時潭未有守而奉議郎奏

辟通判張揆權州事奏友討逐孔彥舟之勞遂有是命
乃以揆通判潭州先是湖西安撫使程昌寓與友交通
亦以便宜檄友為湖東副總管言於朝昌寓坐貶二秩
友在潭州措置酒法官不造酒但收稅酒錢城外聽造
而不得賣城中聽賣而不得造若酒入城則計斗升取

稅公私利之

揆昭慈親姑之子今年六月四日以昭慈遺恩自儒林郎得旨轉一官比類施行今

未踰月不知何以却是奉議即當考昌寓降官在八月己卯今併書之

新除太府寺丞

章億監都進奏院章儼監登聞鼓院章侗並與外任以

言者論姦臣子孫不宜在朝故也上因言小人但不當在朝廷至於閑慢差遣亦當與之豈可絕其生路秦檜曰舉臯陶不仁者遠正謂不可令近君耳上首肯

丁酉徽猷閣直學士銀青光祿大夫王序落職降二官提舉西京嵩山崇福宮序以奉祠滿歲請于朝詔許再任而給事中李擢中書舍人洪擬言其諂事梁師成法當討論乃有是命 詔自今堂除及舉辟差遣之人如礙本貫並不得放上用三省請也 資政殿學士提舉

臨安府洞霄宮呂好問薨于桂州訃聞例外賜帛五百
錄其弟朝散郎言問通判桂州官給葬事言者論靖康
之變好問身為執政不能死節先拜偽楚於庭褒卹過
厚尤為不可上不聽第損賜帛之數而已

減賻贈在
十月辛卯

己亥奉議郎知大宗正丞常同知柳州

庚子朝議大夫新知澧州吳革為潼川府路轉運副使
自置宣撫司後四川監司以勅除者始此 詔通泰鎮
撫使岳飛一軍權留洪州彈壓盜賊以江淮招討使張

俊將班師也遂以飛為神武右副軍統制 宣撫處置使張浚以便宜印造綾紙度牒鬻之川陝京西以助軍用至是以聞詔日下住罷

辛丑皇伯右武衛大將軍信州防禦使令話為寧州觀察使封安定郡王先是燕秦二王後爭襲封久不決禮部員外郎王居正言燕王太祖長子其後當襲封議遂

定令話德昭元孫也

熙寧初首封秦王孫從式已而更封燕王曾孫世清至世福無人宣

和中又封秦王元孫令蓋及是秦王後令庇年長當封而禮官以為小宗乃封令話

壬寅申命有司討論濫賞時范宗尹以上將行明堂故事文武官當遷秩且任子者衆故舉行之上覽條目曰議得當否朕不欲人以事每議及上皇聖德翰林學士汪藻嘗言陛下詔有司立討論之目凡不以道而補官遷秩者皆論如律天下孰不以為宜然此法尚行於吏部而堂除之人則一切置而不問是使孤寒椎鈍者獨廢其終身凡稍黠而有援者巧騰捷出于法度之外而僥冒自如也此豈聖朝行於天下畫一之公法乎臣愚

欲乞應今後堂除人並先取會吏部無有干礙討論事
件如涉討論即依條改正會宗尹乞去位事遂不行
復置翰林天文局太史局學生五十人天文局十人
權湖東副總管馬友在漢陽嘗獻賀天申節銀及是至
行在詔獎之

癸卯奉直大夫景興宗直秘閣知興元府時張俊已用
王庶興宗迄改命 虔州賊陳顥聚鄉丁數千焚掠雩
都信豐諸縣詔趣捕之

甲辰秘書少監程俱言本省見獨員今著作官闕請用
元豐故事牒校書郎或正字暫權詔今後特令秘書省
長貳通修日曆

乙巳朝散郎劉大中為秘書丞大中揚子人也

丙午金左監軍昌自宿遷北歸昌過東平偽齊劉豫不
出迎使人言於昌曰豫今為帝矣若相見無拜之禮昌
怒責之却其獻豫遣偽相張孝純隨而和之昌卒不解
丁未太尉兩浙西路安撫大使淮南揚楚等州宣撫使

劉光世兼海泗州宣撫使時淮北之人歸附者甚衆故命光世安輯之 殿中侍御史章誼言聞邵青自太平州乘船經由鎮江府江陰軍遂入平江之常熟縣所至劫掠劉光世以梟將銳兵而不能應時擒制者邵青所乘皆舟楫而光世皆平陸之兵故也國家既憑大江以為險阻而於舟師略不經意今邵青小醜光世大帥乃敢越境深寇使賊有大於此者將何以禦之臣聞古兵法舟師有三等其舟之大者為陣脚船其次為戰船其

小者為傳令船蓋置陣尚持重故用大舟出戰尚輕捷
故用其次至於江海波濤之間旗幟金鼓難以麾召進
退故用小舟由此觀之凡舟之大小皆可以為守戰之
備不必皆用大舟然後濟也望於駐蹕之地置一水軍
帥以名將計亦易辦詔淮南三宣撫措置時青已移舟
通州海門鎮而行在未知也

戊申詔諸路出賣官田指揮勿行以久佃之民失業故
也

己酉昭慈獻烈皇后虞主往温州太廟上奉辭于行宮
門外宰相率百官城外奉辭退進名奉慰所至郡縣長
吏已下迎送于城外 朝奉郎符確權知昭州書填偽
度牒千二百餘道為轉運司所劾遂遁去詔籍其貲確
瓊州人也

庚戌迪功郎新江西提刑司幹辦公事謝祖信為從事
郎祖信邵武人獻屯田利害于朝乃有是命

壬子武功大夫明州觀察使知真州史康民移知揚州

宣撫處置使張浚承制以直秘閣胡考寧知資州朝奉郎喻汝礪知果州閤門祗候种湘知文州湘師道弟子也考寧初在京西為劇盜薛廣所執用為郢州通判又入王仔軍中黃潛善喜之擢通判襄陽府張浚入蜀考寧從辟以行積官朝奉大夫直秘閣既而御史奏其狀遂罷之仍詔宣撫司自今毋得與守倅差遣

據狀考寧以去

年十月四日到州其罷郡在今年八月己卯

癸丑直顯謨閣知台州晁公為罷直龍圖閣新知台州

沈與求令疾速之任先是天台人求珍以殺人繫獄珍以金賂公為之妻遂得不死降授承事郎知天台縣劉默言之都省及御史臺范宗尹與公為厚庇之乃移默他官命憲臣施垆究實

五月辛酉垆依違以聞

七月戊中上覺其

意內批公為先次放罷宗尹始黜

乙卯朝散郎廖剛為尚書吏部員外郎時辛企宗奏剛招安余汝霖不當剛上疏自辨上曰近數訪問臺諫及上殿士人皆言剛有守必不與賊交通富直柔范宗尹

又稱其賢乃有是命

上諭在是月庚戌

中書舍人林遜轉對

論金雖北去安知不示弱以怠我師候秋高馬肥遣李成招集瀕淮飢民呼吸羣盜侵軼江南徐遣勁騎由真揚福山擣虛浙右願乘此時聚衆積粟蒐將閱士以備防秋之計今日之弊在於兵不習戰將不肅命財用殫匱民食艱鮮州縣以軍興為名而掊取無度此廼腹心之深病政事所當先而盜賊縱橫尚為病在四肢可以漸去也惟陛下與大臣汲汲講圖之

初五湖捕魚人

夏寧聚其徒為盜後有衆千餘專掠人以為食郭仲威嘗招之不應命至是受劉光世招安又有仲威餘黨出沒于淮南亦受光世招安皆令來長蘆蒞舟以濟寧等無食半月之間復陷萬餘人是日始具舟迎之由是江北鄉村愈覺凋殘矣

丁巳降授武功大夫康州刺史韶州居住張思正許自便通議大夫試刑部尚書胡直孺以攢宮頓遞之勞進二官直孺不受

已未昭慈獻烈皇后卒哭命左監門衛大將軍士噐即
內中天章閣几筵前行卒哭之祭上不視事百官進名
奉慰

辛酉故追復觀文殿學士劉摯贈少師後謚忠肅以其

子知開州長歷有請也

摯渤海人元祐尚書右僕射黨
藉執政第六人新州安置六年

五月丙
子再贈

召江東安撫大使兼知池州呂頤浩赴行在

欲代范宗尹也是日頤浩督諸將與張琪戰于饒州城
外大敗之琪自徽州引兵犯饒州衆號五萬時頤浩自

左蠡班師帳下兵不滿萬郡人大恐願浩遣統制官巨師古招降之琪詐受招誘師古入其營遂薄城下統制官右武大夫宣州觀察使閻臯願浩愛將也方捕盜于宜黃走檄呼之會臯平盜而歸星馳以赴願浩召諸統兵官姚端崔邦弼顏孝恭郝最等駐軍城外皆令聽臯節制端軍為左邦弼軍為右臯將中軍願浩自畫陣圖授之琪兵至近郊前軍將張俊失利琪恃其衆直犯中軍臯力戰而端邦弼兩軍夾擊遂大破之追奔三十里

殺賊甚衆賊又別遣水軍分道自景德鎮來犯頤浩遣

統領官張慶以崔增餘衆禦之琪遁去夜其愛將姚興

以所部詣巨師古降琪遂走浮梁縣復還徽州

此以呂頤浩所

奏及熊克小歷參修克繫之今年五月未按日歷江東
安撫司以八月九日奏到以為二十七日事蓋七月二
十七日辛酉也故移附此但克以為臯等繞出城五里
而賊先鋒已至頤浩所奏乃云令臯等披城下寨二十
七日巳時賊兵到十五里外則克所云誤也克又云賊
別遣精銳為水軍分道而進頤浩自將水軍禦之而所
奏乃云本司前期於都昌縣勾集崔增者寨老小將兵
千人令統領官劉慶部領橫截賊兵奪船四十餘隻則
非頤浩自將也巨師古被執姚興來
降克並不書今以頤浩所奏增入

壬戌宣教郎新通判嚴州黃策直秘閣策吳縣人元符末以上書入籍坐廢久之上方錄用黨人策因上疏言昭慈獻烈皇后既過瑤華泰陵嘗有悔意以蔡京所錄上皇聖語親札上之故有是命

日歷無此今以紹興三年孟忠厚奏割修入

癸亥尚書右僕射同中書門下平章事兼知樞密院事范宗尹充觀文殿學士提舉臨安府洞霄宮初宗尹既建討論濫賞之議士大夫僥倖者爭排之諸大將楊惟忠劉光世辛企宗兄弟皆嘗從童貫行軍論者疑其亦

當貶削

此據朱勝非秀水錄然朝廷元旨止謂虛作從軍之人勝非所云蓋當時沮議者之說云耳今

畧修潤增入

吏部侍郎高衛初以圍田改官

此據紹興二年二月章疏及

是主右選力持此以為不便上疏詆之同知樞密院事李回亦言宣和間任中書舍人以校正御前文籍遷官乞削職罷政上曰宣和政事恐不必一一皆非人主留意文籍自是美事豈可與其他濫賞同科參知政事秦檜曰此法一行濁流者稍加削奪便比無過之人誠為僥倖清流者少挂吏議即為辱甚大不敢立朝恐君子

受弊上顧諭宗尹宗尹曰此事如回者無幾其他亦不足惜遂降旨侍從及館職兼領者罪又詔武臣濫賞並免討論令尚書省榜諭其日壬子也

日歷六月十八日有旨應武臣濫賞

並免討論退奪按此時尚未進呈討論文字日歷誤也熊克小歷亦云高衛先上疏詆之乃罷武臣討論既而李回乞罷政云云據克所書亦承日歷之誤蓋罷武臣討論乃七月十八日而日歷所供檢人誤在六月耳日歷中如此命既下上終以為難後二日上批朕不欲歸者甚衆

過君父斂怨士夫可日下寢罷

七月甲寅

宗尹堅以為可行

即日求去翌日遂召直龍圖閣新知台州沈與求赴行

在按是日乙卯又一日輔臣進呈上曰天下事不必堅執至

如人主有過尚許言者極論若遽沮遏祇須人不進言

如此則於誰有損七月丙辰始宗尹之建議也檜力贊之至

是見上意堅反以此擠宗尹又五日詔驛召呂頤浩次

日遂召翰林學士汪藻草宗尹免制曰日者輕用人言

妄裁官簿以廟堂之尊而負天下之謗以人主之孝而

暴君親之非朕方丁寧德意而申命于朝汝乃廢格詔

書而持必于下宗尹入相踰一年始宗尹與辛道宗兄

弟往來甚密上不樂之及是遽罷於是崇觀以來濫賞
悉免討論但命吏部審量而已

討論濫賞初見建炎二
年十月丙子四年六月

辛巳今年七月壬寅再舉行熊克小歷云侍御史沈與
求條宗尹大罪二十宗尹力請罷政蓋誤此時與求未
還朝今年九月乃用與求言
奪宗尹職名克不詳考耳

詔曰朝請大夫知邛州

王俱尚書右司員外郎萬格以刻薄之資成傅會之惡
首建討論之議盡失士夫之心姑示輕刑用懲私意可

並送吏部

熊克小歷云俱格時並為都司
按俱今年二月已出守克誤也

上因諭輔臣

曰俱格既罷自此恐紛紛不已日後當盡置勿論恐分

明植黨非國家福張守曰此陛下盛德臣欲建議未敢
富直柔曰前日呂頤浩趙鼎之去陛下與之終始到今
今於宗尹復如此聖性忠厚天下之幸也

甲子命同知樞密院事李回朝拜昭慈獻烈皇后攢宮
先是禮官以明德權攢故事請上行朝拜之禮既而以
道遠不可親詣乃命回代行

是月川陝宣撫使張浚以直龍圖閣利州路提點刑獄
公事楊斌為永興軍路經略安撫使朝散郎知巴州馮

檄為利州路提點刑獄公事

利路提刑題名賦以此月二十九日被受宣劄檄以

九月六日到故並附此月末但不

知是時永興帥寓治何地當考 武翼大夫知濠州

李玠棄城去以巡防官張德權知州事玠在濠州當羣

盜縱橫之時以嚴酷殺伐為政縱所部擾民故能得軍

士之情久處危城中金珠寶貨不可勝計玠欲順流東

下為鳳凰州寇宏所扼至是玠貽書與宏通好宏許之

玠遂挈其孥泛淮而去 偽齊劉豫以其子太中大夫

知濟南府麟為諸路兵馬大總管尚書左丞相封梁國

公戶部尚書張昴兼權左丞兼門下侍郎

偽豫傳載此事於阜昌二

年而無月按日歷今年八月十九日癸未劉光世
繳豫偽詔已用麟為左相銜故參酌且附七月末

八月乙丑朔詔奉安天章閣祖宗神御於法濟院以乘
輿播越神御猶在舟中故也 宣撫處置使張浚娶直

秘閣成都府路轉運判官宇文時中女時中已詔時中奉
祠而浚稱其有勞承制陞時中副使再任時中虛中弟
也 成都記時中以八月一日陞副使日歷時中
十二月四日除副使再任今附初除之日

丙寅利州觀察使湖東馬步軍副總管孔彥舟為斬黃

鎮撫使兼知黃州用張俊奏也時彥舟在鄂州舟多糧
富俊恐其盤據要地故奏用之拱衛大夫相州防禦使
新除舒蘄鎮撫使張用有衆五萬在瑞昌後數日俊親
揀其軍精銳者留之老弱者許自便有投曹成者有投
岳飛者有投韓世忠者有自去而為民者俊既并其兵
遂以用為本軍統制趙姓之遺史云俊以八月壬申親
揀用軍今併書之按宋史繫丁

日卯

武顯郎南雄州兵馬都監郭康偽造制書自稱奉

使廉察廣東兵官已下轉運判官章傑覺其詐捕送廣

州誅之至是以聞 武功大夫康州防禦使入內侍
省副都知梁邦彥特遷昭宣使錄攢宮之勞也

丁卯觀文殿學士新知潭州吳敏為荊湖東西廣南路

宣撫使兼知潭州時江湖餘寇未平而敏留居嶺右故

就

克小歷今年六月末書初舊相吳敏方責居
涪州范宗尹薦敏復觀文殿學士知潭州敏以

祖母年高力辭遂改資政殿學士提舉洞霄宮至是又
復敏觀文之職充廣西湖南宣撫使按敏以靖康元年
九月責涪州建炎元年五月移柳州已而自便四年七
月復官今年七月甲子除知潭州八月丁卯除荆湖東
西廣南宣撫其年十二月乙丑改資政奉祠
克所云官職及先後皆差誤不知何以如此

山東統

制忠義軍馬范溫所遣參議軍事李植至行在

溫遣植事見今

年五月丙寅

上嘉之以溫為武翼郎閤門宣贊舍人統制山

東忠義軍馬仍鑄印以賜而植亦補承事郎

戊辰參知政事張守等上對修嘉祐政和勅令格式一

百二十二卷看詳六百四卷詔以紹興重修勅令格式

為名自來年頒行 中大夫直秘閣新知饒州王喚提

舉臨安府洞霄宮喚以鄭居中故積遷至大官時方討

論故有是請

喚仲山子鄭居中女壻已見建炎元年四月

右司諫韓璜論

堂吏滑浩等與討論濫賞文字秦檜曰吏行文書耳恐不必罪李回曰如罪兩都司彼自無詞上曰兩都司殊刻薄為朝廷建議須有忠厚之風乃以浩送吏部 江西安撫大使朱勝非言自正月領事至今所降軍儲漕司未嘗發到斗升顆粒又六月中給降監鈔七萬緡其資次乃在同時降下一百萬緡之後未知算請當在何時詔委漕臣張滙濟其軍食滙河南人也勝非又別疏論安撫大使名甚重而無錢糧及兵實不及一小邑然

勝非受命踰年遷延不進逮張俊班師始入城視事論者咎之

己巳責授寧遠軍節度副使汪伯彥復正議大夫提舉臨安府洞霄宮以參知政事張守言其才可用也後四日遂以伯彥為觀文殿學士江東安撫大使兼知池州權尚書工部侍郎韓肖胄以修勅成落權字大理

卿王衣權尚書刑部侍郎尚書右司員外郎趙子畫等各遷一官以權貨務歲中收茶鹽香錢六百九萬餘

縉故也

庚午直龍圖閣沈與求試侍御史上嘗從容言王安石之罪在行新法與求對曰誠如聖訓然人臣立朝未論行事之是非先觀心術之邪正揚雄名世大儒乃為劇秦美新之文馮道左右賣國得罪萬世而安石於漢則取雄於五代則取道是其心術已不正矣施之學術悉為曲說以惑亂天下士俗委靡節義凋喪馴致靖康之禍皆由此也 徽猷閣待制提舉臨安府洞霄宮李光

知饒州時饒信寇盜甫平光方里居而停官人康允之未叙乃復允之朝請大夫與光分守二郡允之行至長溪而卒

辛未刑部尚書兼侍讀胡直孺守兵部尚書

壬申吏部員外郎胡世將奏其兄唐老靖康中嘗建議除上為大元帥且為之請諡上曰當時之事亦偶然耳何功之云張守等退而歎曰大哉王言尚書兵部員外郎陳與義試起居郎故追復奉議郎張庭堅贈直

龍圖閣

庭堅廣安人元符末右正言黨籍餘官第二十九人象州編管

洺州防禦使

知西外宗正事士從自衡州移司温州所過騷擾詔罷之

癸酉初命大禮後引試刑法官自渡江久廢至是舉行

之

此以二年二月六日刑部申明狀增入

乙亥上諭輔臣曰黨籍至今追贈未畢卿等宜為朕留

意程頤任伯雨龔夬張舜民此四人名德尤著宜即褒

贈乃贈夬直龍圖閣

夬河間人元符末殿中侍御史黨籍餘官第三十五人化州編管

時工部侍郎韓肖胄嘗密啟上乞追褒元祐諸臣故有是諭

丁丑命右監門衛大將軍士芑祔昭慈獻烈皇后神主于温州太廟哲宗室用太常少卿蘇遲議位在昭懷皇后之上是日韓肖胄題神主罷藏虞主于西夾室上不視事百官進名奉慰故事虞主瘞于殿後議者以上方巡幸當瘞還闕依故事施行後遂為例士芑濮王曾孫也陷金得歸及是甫至行在

戊寅參知政事張守充資政殿學士提舉臨安府洞霄宮侍御史沈與求言守舉汪伯彥不當守引疾乞祠而有是命 同知樞密院事李回參知政事端明殿學士簽書樞密院事富直柔同知樞密院事 武德郎閤門宣贊舍人滁濠鎮撫使劉綱為兩浙東路兵馬副鈐轄詔綱不即還鎮罪當誅責以其父忠勞特與原貸其羣從六人皆授官有差 武信軍承宣使辛興宗卒特贈檢校少保安化軍節度使 初宣撫處置使張浚以書

抵范宗尹報關陝曲折及以去秋出師失律上章待罪
會宗尹已去位輔臣以其書進呈上曰比屢有人言便
欲行遣朕以人君用人當以大度聽其所為但責成功
俟無成功責之未晚浚又奏本司主管機宜文字傳勞
擅用便宜未嘗赴司供職乞罷之零時已在張俊軍中
詔可其請浚念上繼嗣未立是日密奏乞講明故事擇
宗室之賢優禮厚養以為藩屏於是上已命選二人而
浚蓋未知也

庚辰故追復端明殿學士降授奉議郎蘇軾特贈資政
殿學士朝奉大夫以其孫宣教郎知蜀州符言復官未
盡也

辛巳詔尚書省復置催驅三省房及催驅六曹房范宗
尹之相也事多留滯比其罷相制下省吏抱成案就宗
尹書押者不可勝計言者請命大臣相度委本省官各
一員監督點檢諸房文字置籍結絕故復舊制 詔福
建制置使辛企宗自建州移屯福州時帥臣程邁言下

四州已為盜所殘今熊志寧等作亂

事見六月丁亥

恐侵軼餘

郡乞遣一軍自溫台直出以備之朝廷亦以企宗玩寇

故命企宗移屯會江東統制官閻臯招降潘逵所部叛

兵

事見六月壬午

企宗請其兵自隸遂詔臯以全軍往福州受

企宗節制

遣閻臯在此月癸未

壬午成忠郎虔化縣巡檢權縣事劉僅為秉義郎閻門
祇候李敦仁破虔化縣僅擊去之郡守上其功故有是
命 徽州言張琪復入祁門縣詔張俊遣兵捕之 詔浙

西安撫大使司統制官拱衛大夫忠州刺史王德領同
州觀察使餘將士萬一千五百七十五人皆進官有差
錄防江之勞也

癸未進呈劉光世所繳劉豫偽詔詔尾乃其子為左相
銜也上曰可見豫褊陋 朝請大夫致仕周諤遷中大
夫致仕諤范純仁甥王覲子壻陳瓘婦兄也元豐中嘗
上疏請修京城神宗命籍其名欲加擢用元符末上疏
言章惇罪且論元符后不可配先帝寢廟遂坐廢錮至

是其子從事郎淵以為請故錄之

諤黨藉餘官第
一百六十八人

詔

宣撫司類省試五路舉人許依舊制別項考校以陝西
陷沒故優之也

乙酉詔樞密院選使臣賈蠲書賜陳蔡二郡令掩殺李
成成既敗其餘黨趙端等皆來降朝廷聞成在順昌詔
知淮寧府李寶知蔡州范福合兵掩捕先是福以蔡州
危棄城遁去土豪李祐馮直率軍民以守言於朝乃以
祐為淮寧順昌府蔡州鎮撫使

日歷八月辛卯權蔡州
馮直七除李祐鎮撫使

降旨未聞九月甲寅詔淮寧等州鎮撫使李祐與崔興
桑仲王彥互相救應不知以何日除今併附此 按宋

史繫庶

寅日

丙戌中奉大夫提舉臨安府洞霄宮翁彥深復集英殿
修撰

丁亥參知政事秦檜守尚書右僕射同中書門下平章
事兼知樞密院事范宗尹既免相位久虛檜昌言曰我
有二策可以聳動天下或問何以不言檜曰今無相不
可行也語聞遂有是命

林泉野記云檜還朝為禮部尚
書紹興初除參知政事檜曰陸

下用臣臣必能聳動天下之士後宰相范宗尹罷上欲用呂頤浩已詔之富直柔韓璜辛道宗永宗皆懼其來密薦檜為相俾塞其進乃拜尚書右僕射按諸書皆言檜與直柔爭進故以道宗兄弟為直柔之黨深疾之其後得政竄斥無餘今乃云道宗薦檜恐誤餘見今年九月癸丑呂頤浩拜相注 詔諸路折帛

錢昨每足三千慮高下不等若一槩立定有虧公私自

來年令諸路漕司各估實直申省聽候指揮約折時諸

路絹直繞二千所折高民多倍費故言者以為請云此見

四月壬午熊克小歷既不載元旨又云自今各估以實直而節去來年自各申省聽候指揮之文遂失其實今

依日歷書之

戊子贈張舜民寶文閣直學士程頤任伯雨並直龍圖閣制曰朕惟周衰聖人之道不得其傳世之學者違道以趨利捨己以為人其欲聞仁義道德之說者孰從而聽之間有老師大儒不事章句不習訓傳自得於正心誠意之妙則曲學阿世者又從而排陷之卒使流離顛仆其禍賊於斯文甚矣爾頤潛心大業無待而興者也方退居洛陽子弟從之孝弟忠信及進侍帷幄拂心逆旨務引君以當道由其內以察其外以所己為而逆所

未為則高明自得之學可信不疑而浮偽之徒自知其學問文采不足表見於世乃竊其名以自售外示恬默中實奔競外示朴魯中實姦猾外示嚴正中實回僻遂使天下聞其風而疾之是不幸焉爾朕錫以贊書寵以延閣所以振耀褒顯之者以明上所與在此不在彼也尚其明靈知享此哉先是顯子端中知六安軍為盜所殺其孫將仕郎晟在韓世清軍中伯雨子承務郎先由建炎初嘗除御營使司主管機宜文字不赴至是詔並

赴行在

舜民邠州人建中吏部侍郎黨籍待制以上第三十一人商州安置顧河南人元祐崇政殿說

書黨籍餘官第三十三人涪州編管伯雨眉山人建中右正言餘官第二十八人昌化軍編管

神武

左軍都統制韓世忠請以明堂恩澤為子忠翊郎閣門

祇候亮易文資許之諸將以文資祿子孫蓋自此始於

是浙西安撫大使劉光世已任孫正平為班行既而亦

請換授遂以為例

光世陳乞在十一月己亥

己丑直秘閣浙西提舉茶鹽公事梁汝嘉言本路歲收鈔錢一百十九萬緡詔汝嘉及幹辦公事迪功郎方滋

主管文字修職郎蘇師德各進秩一等明年又增五十

一萬滋蒙孫

蒙盧人元祐中為御史

師德頌孫也

頌丹陽人元祐間右僕射

大理寺丞梁藻奏諸鎮帥臣援授文資者並令赴行在量試程文以觀素所蘊習然後等第推恩從之

庚寅銀青光祿大夫提舉臨安府洞霄宮李綱復資政殿大學士通議大夫提舉臨安府洞霄宮許翰中大夫提舉臨安府洞霄宮李邴並復端明殿學士初綱既奉祠久之未叙右文殿修撰胡安國嘗獻覈實論言如綱

才氣亦不易得特以疎直幾至殺身望行辨雪稍復故
官庶使後來宰相赤心為國者不懼不報至是以改元
德音而有此命 勒停人王庭秀叙承議郎 詔募人
往河南伺金齊事宜且持蠅書慰撫忠義人之保聚者
至汴京人給錢七十千還日有驗授保義郎餘州等第
賞給

辛卯尚書右僕射秦檜為明堂大禮使參知政事李回
為禮儀使兼禮衛使同知樞密院事富直柔為禮器使

兼禮頓使五使不置局令三省禮房專行自是遂為故事
右司諫韓璜論新除觀文殿學士江東安撫大使
汪伯彥為相誤國不常用不報疏再上上曰治天下蔽
以一言曰公而已朕亦安得而私乃詔伯彥提舉臨安
府洞霄宮職如舊秦檜之少也嘗從伯彥游學至是伯
彥雖罷帥而因得職名蓋檜力也
林泉野記云檜拜右
僕射若誤國之相汪

伯彥首復其官與
之宮祠以報舊恩

故中大夫直龍圖閣張上行贈集

英殿修撰上行自夔州移興元未至道病卒張浚言其

在夔州捍禦有勞故有是命

上行之死當在建炎四年秋或可移附其年七月末

詔停官人降授右武大夫和州防禦使漢州居住辛
彥宗許自便彥宗提舉承興秦鳳路保甲兼提刑張浚
按其罪貶秩五等至是用赦而復之

壬辰直秘閣知太平州郭偉令再任以土人武節郎致
仕儲宏等舉留也時新守通直郎方承已視事偉行至
鎮江而返承閉子城拒之偉乃借用兵馬都監印莅事
於班春堂事聞詔停承官而偉以守城功陞直徽猷閣

既而言者論偉貪殘亦罷去踰年獄具承坐貪祿罰金

云日歷今年九月丙辰偉陞職名十月丁卯偉申承不

令選任承中偉有職詔提刑司體究十一月乙未尚

書省勦會方承違拒勅命而閉城門不令郭偉入城交

割又直中臺諫有劫持朝廷之意詔方承先次勒停令

建康府取勘庚子臣僚上言郭偉有入已贓八千實行

剗剔之也乞放罷取勘詔偉先次放罷之四月丙戌刑

部大理寺狀建康府勘到方承慮夫祿養要占總差遣

按發郭偉姦贓等事法寺稱准條私罪杖罰銅七斤有

旨依斷洪邁夷堅已志當塗圭田最厚民事清簡居官

者樂之紹興初過守郭偉滿秩不遣吏卒迎新守方

承不能俟送人擎舟徑至郭閉子城拒之云已申朝廷

乞補謁告月日方君乃借用兵馬司印蒞事於旌春堂

監司具奏其狀兩人皆罷去

按邁所記本末差誤今不取

詔夏國歷日自今更不

頒賜為係敵國故也

癸巳朝請郎守大理少卿王綱進秩一等綱為郎刑部
歲中駁正死罪囚五人徒流已下甚眾故有是命 停
官人鄧雍復為朝請郎

是月吏部員外郎廖剛言古者天子必有親兵實自將
之所以備不虞而強主威使無太阿倒持之悔漢北軍
唐神策之類是也祖宗軍制尤嚴如三衙四廂所統之
兵關防周盡今此軍稍廢所恃以備非常者諸將外衛

之兵而已臣願稽舊制選精銳十數萬人以為親兵直
自將之居則以為衛動則為中軍此強幹弱枝之道最
今日急務昔段秀實嘗為唐德宗言譬猶猛虎所以百
獸畏者爪牙也爪牙廢則孤豚特犬皆能為敵正謂是
也願陛下留神毋忽 初武功大夫榮州團練使知郢
州曹成雖受官爵稱兵如故自鄂岳引兵數萬掠湖西
先是比部員外郎万俟高避亂乞主管亳州明道宮居
沅湘間安撫使程昌胤用便宜檄高權沅州事成掩至

城下沉城小而惡高晝夜廬城上召土豪集丁壯以守
成食盡引去與知復州李宏合軍屯瀏陽縣既而二人
有不相下之心成引衆攻宏宏遂奔潭州湖東副總管

馬友令宏屯於湘陰而成亦移屯攸縣

曹成圍沅州據
萬侯高墓誌不

得年月按明年正月癸丑郴州奏成以八月間至攸縣
故併附此高初見建炎二年五月其除郎及奉祠月日
史皆失之修職郎知攸縣范寅遜聞成掩至走連州避之寅

遜建陽人也 斬黃鎮撫使孔彥舟在鄂州受命遂以

所部知黃州

建炎以來繫年要錄卷四十六

欽定四庫全書

建炎以來繫年要錄卷四十七

宋 李心傳 撰

紹興元年九月甲午朔宣撫處置使張浚奏邊事上謂
輔臣曰金人既去陝西必可經理荆楚以南亦須措畫
庶幾形勢相應有收復之漸秦檜唯唯奉訓 中書舍

人席益兼權直學士院

熊克小歷在八月蓋因學士院題名也今從日歷

給

事中李擢罷為顯謨閣待制知嚴州先是侍御史沈與

求奏擢嘗事偽庭不當用不報擢求去乃有是命 中

書言池江二州地勢僻隘失祖宗分道置帥之意詔江

東西路帥臣復還建康府洪州舊治

熊克小歷在八月庚辰今從日歷

女真人古裕特補修武郎閣門祇候賜姓趙古裕自

楚州歸劉光世軍中故錄之

乙未親衛大夫寧州觀察使韋淵求差遣上曰淵以宣
和皇后季弟義當敦睦然其人素不循理難以出入禁
闈故斥遠之朕不敢以公爵示私恩密院可與一遠闕

恐居官有過難以行法已而以淵為福建路副總管

淵除

總管日厯不書今以紹興三年三月二十三日淵乞宮祠狀增入

殿中侍御史章誼

守大理卿 劉豫之從弟與為疆吏所獲詔送處州羈管

丙申直寶文閣知建康府張縝移饒州徽猷閣待制新
知饒州李光移婺州右文殿修撰江東安撫大使司參
謀官權知池州劉洪道移宣州時復以建康為帥府而
江池皆命武臣故三人改命 温州觀察使神武前軍

統制王瓌知池州檢校少保建武軍節度使江西馬步
軍副都總管楊惟忠知江州並兼沿江安撫使各將本
部軍馬之任其錢糧令尚書省應副

按宋史繫
甲午日

湖東

安撫司言曹成李宏犯潭州之瀏陽詔趣吳敏摘那廣
西軍馬前來潭州之任屏捍二廣 斬進義校尉李世

臣於越州市世臣敦仁弟也世臣既為官軍所獲而敦仁
據虔化縣仙山叛服未定江西安撫大使朱勝非自為
文檄募太學生彭世範往招之不數日敦仁與其徒二

十餘人請降然尚未解甲後錄其功以世範為右迪功

郎

熊克小歷載此事於今年五月仍云世範誘敦仁出降然後諸郡解嚴蓋因勝非行述所書也其實敦仁

雖受招仍犯虔化縣十月丙寅勝非罷帥十二月甲戌詔顏孝恭等討之或者因勝非罷而再叛亦未可知今

參酌附此世範明年十月丙寅補官

迪功郎宣撫處置使司書寫機密

文字張滉特改承務郎以其弟浚請以扈駕所遷一官

回授也 朝散郎吳必明知邵武軍時盜賊蜂起守臣

朝奉大夫張公庠不能制言者請擇能吏遂命必明代

之必明崇安人也

戊戌刑部奏軍士黃德等劫殺案目其從二人俟于岸
次刑寺欲原死上曰強盜不分首從此何用貸朕居常
不敢食生物懼多殺也盜於此時須當殺以止殺富直
柔曰物不當死雖蚤虱可矜其當死雖人不可恕上甚
以為然 詔統制官李復興所部軍將四百五十人隸
神武中軍其民兵九百餘人皆縱之復興未見 浙西安撫
大使劉光世奏邵青窮蹙恐其絕洋犯明州詔樞密院
準備將領徐文以舟師屯定海縣 召朝奉大夫陸欽

彥赴行在令成都府津遣欽彥建炎初提舉陝西茶馬

因事罷去至是復官

欽彥紹興五年以左中奉大夫為宣謀

己亥詔文臣寄祿官依元祐法分左右字賦罪人更不帶以示區別用樞密院編修官楊愿請也其后選人亦

如之

選人分左右在明年二月丁卯

資政殿學士提舉西京嵩山崇

福宮葉夢得為江東安撫大使兼知建康府兼壽春等

六州宣撫使

宣撫處置使張浚承制以中大夫劉鋹

為夔州路轉運副使右文殿修撰提舉亳州明道宮劉

觀知遂寧府浚又言朝請郎楊晟惇挾持詭計躡求高
官包藏禍心常幸時變公肆狂悖鼓惑衆聽望賜竄黜
羈管詔浚一面施行先是浚以便宜授晟惇官至中大

夫直徽猷閣及是盡奪之觀辭不赴

晟惇所遷官職不
得其年月按日歷

紹興七年十一月乙巳晟惇以左朝請郎陳乞換給左
中大夫直徽猷閣告命得旨依故附於此浚所謂躡求

高官蓋
指此也

是夜雷

庚子以張琪賊馬壞宣州太平州圩田命守自葺治州

宣州

化城惠民二圩相連長八十里太平州蕪湖縣方春陶
新和政三官圩共長一百四十五里當塗縣廣濟圩長

九十三里於
時長五十里

是日張琪犯宣州琪在宣城南陵之間

駐於孔村其下李捧華旺謀殺琪以降辛丑琪遁去捧

聞劉洪道在池州欲受其節制洪道遣統制官李貴招

之朝廷聞琪等犯宣州乃詔神武前軍統制王瓌以其

軍討琪然後之鎮

日歷宣州中張琪九月七日侵犯本
州城下七日庚子也十月辛未江東

安撫大使司中李捧狀自九月八日不
曾再犯宣州初九此壬寅也今附此

壬寅江西安撫大使兼知江州朱勝非言本州殘破之

後闕官甚多無人願就欲乞州縣文武官到任一年及

任滿各轉一官選人任滿通理四考改合入官後不為

例從之

此以今年十月十五日使部供到狀修入

河南鎮撫使程興遣幹

辦公事文林郎任直清部契丹降人赴行在至召對直

清具奏西洛艱危之狀及陵寢事上愍歎久之以直清

為宣教郎直秘閣賜五品服進興三官為武功大夫加

忠州團練使 勅令所小吏成忠郎楊球蔡京家吏楊

括之子也范宗尹薦於上令後省策試授以文資

七月丁巳

日降 旨 侍御史沈與求以為不可乃罷之

甲辰中書舍人胡交修洪擬並試給事中中書舍人林
通充寶文閣待制知廣州秘書少監程俱為中書舍人
尋詔俱免召試 直徽猷閣添差兩浙轉運副使方孟
卿為尚書右司郎中右文殿修撰知温州盧知原添差
兩浙轉運使 初朝廷以張琪邵青反覆為盜命諸將
毋得招安而徽猷閣待制知平江府胡松年言大軍四
合連旬不能破賊今青據通州崇明鎮沙上寨柵之外
水淺舟不可行泥深人不可涉本府錢糧已費十三萬

貫石公私騷然而賊未可睥睨况劉光世兵將類多西北人一旦從事江海間有掉眩不能飲食者况能與賊較勝負於矢石間哉先是光世奏已遣統制官王德討青又奏青窮蹙朝廷以為然及松年有是言乃令光世措置後二日右司諫韓璜亦奏謂青擁舟數千艘而朝廷未有舟師制禦恐轉入海道驚動浙東且浙西正當收成之時青若倏來必誤國計又師老費財或偽齊寇江藉青為用凡可慮者五事疏奏遂趣光世招降之

禮部言自今應賢良方正科乞並用從官三人薦舉不
如所舉者坐之故事閣試六題以五通為合格及是侍
郎李正民員外郎王居正言今復科之初使士大夫徒
能記誦義疏亦無補於用欲權罷義疏出題外餘如舊
制詔兼於義疏出題仍以四通為合格

乙巳進士呂元亮補迪功郎元亮平江人以薦對而有
是命 詔百司稽違許御史臺六察官彈奏以侍御史
沈與求援元豐舊制有請也 是日呂頤浩自饒州至

行在

丙午左奉直大夫王實為淮南東路營田副使上召對使往鎮江與劉光世同集其事實韶子也

韶江州人元豐樞密使

所 胡衛大夫成州防禦使楊忠憫提點製造御前軍器

丁未詔樞密院每半年遣使臣二員往河南省視諸陵因撫問所屯將士用起居郎陳與義請也 命湖東馬步軍副總管馬友移屯鄂州 尚書省請下江浙福建

諸州造甲五千副兩浙之婺衢明湖州平江府江西之
虔吉洪撫州各共千五百福建千二百饒信州八百遂
州令通判一員董其事所費以上供折帛錢支從之
已酉上齋於內殿

庚戌命右監門衛大將軍士芑朝饗太廟神主於温州

此據
會要

辛亥合祭天地於明堂太祖太宗並配赦天下諸州守
臣更不帶節制管內軍馬免殘破州縣耕牛稅一年越

州曾得解舉人並免將來文解一次諸路大辟可免奏

案緣道路未通並聽減等決遣

二年正月乙未申明改正

唐李氏後

唐李氏後漢劉氏周郭氏柴氏子孫並各與一班行名

目錄用元符末上書人子孫應遇兵道棄小兒十五歲

以下者聽諸色人收養即從其姓諸盜許一月出首自

新前罪一切勿問是日以常御殿增築地步為明堂止

設天地祖宗四位其位版朱漆青字長二尺有五寸博

尺有一寸厚亦如之用丑時一刻行事上親書明堂及

飛白門榜時未有蒼壁黃琮禮官引故事請以木為壁
繪天地之色上以祀天不當計費厚價市玉以製之既
而尺寸不及禮經乃命有司隨宜製造禮畢就常御殿
外宣赦書以行宮門前地峻狹故也是歲內外諸軍犒
賜凡一百六十萬緡而戶部椿辦金銀錢帛三百五萬
四千七百餘貫匹兩皆委官根括於諸路此據三月甲寅戶部侍郎
孟庚川陝諸軍則宣撫處置司就以川路助賞物帛給
所奏之此據紹興四年二月自諸軍外宰執及百官並權行
二十日日本司所申

住支以貢賦未集故也

八月壬午降旨未知建炎二年如何當考

時中書舍

人兼直學士院席益草赦文有曰上蒼懷悔禍之心羣策竭定傾之力六師奏凱九扈成功爰舉宗祈聿修大報上以其夸大不悅

壬子嗣濮王仲湜請合西南外宗正為一司以省官吏事下給舍中書舍人胡交修等言泉州乏財不許是時兩外宗子女婦合五百餘人歲費錢九萬緡

南外三百四十九人

歲費錢六萬緡西外一百七十六人歲費約三萬緡

癸丑鎮南軍節度使開府儀同三司呂頤浩拜少保尚

書左僕射同中書門下平章事兼知樞密院事頤浩引

故事辭所遷官乃以特進就職

頤浩改特進在十月乙丑今併書之趙姓之遺

史范宗尹罷相乃召呂頤浩而先相秦檜又富直柔韓
橫辛道宗永宗皆譖頤浩故到闕多日而未除拜人
皆疑之俄拜少保左僕射按史頤浩以七月二十日降
召命九月十二日到行在適值明堂齋禁十六日得旨
陪祠十八日明堂十九日鎖院二十日拜相此云到闕
多日者誤也道宗時已除福建副總管姓之亦誤今畧
刪潤於辛永宗
罷去時修入

甲寅尚書戶部侍郎孟庾試戶部尚書 詔官兩浙錢

氏子孫嫡長者一人以赦書所未及故也 初上以中

書舍人兼直學士院席益草赦文夸大惡之會益草呂

頤浩復相制有曰朕中興聖緒兼創業守文之難上尤

不喜乃出益為顯謨閣待制知温州中興聖政臣留正

以代王言詞翰雖成於人臣之手而其所以為言者若出於人君之口則為得體若其夸大而稱美則是人君自大而自美也豈禮也哉然而人之常情莫不好大而悅美故人臣之為是言者亦或不以為非今太上皇帝以赦文夸大為悖拂朕心而以麻制兼創業守文之言皆以為太過黜當時詞翰之臣以見其心之所不然者其為謙抑也至矣豈

起居舍人侯延慶以母老求去

除右文殿修撰知潮州 直顯謨閣江東轉運副使曾

紆為直寶文閣以紆自陳係元符黨特遷之也

紆係黨籍餘官

第九十八人建中太僕寺主簿袁州編管初見建炎三年三月癸巳

既而右司諫韓璜言

今日禍首實自王安石變新法始方安石秉政布以親

戚最先引用聚斂刻剝之事布皆與謀逮建中靖國初

故相韓忠彥守正持重布為右相每留身以破壞忠彥

所為卒逐忠彥而成京賊之勢者布也至紹聖間與章

惇爭權乍合乍離皆出為身本非國計紆在宣和間奔

走闔寺門下蓋以交結而取官爵矣近乃撰造正論以

欺廟堂望賜追奪紆遂罷去

紆罷在此
月庚午

詔進士何溥

特補上州文學以江淮招討使張俊言其招降李成餘
黨趙端有勞也

乙卯贈故朝奉郎知岳州袁植直龍圖閣官其家二人
於是編管人汪若海亦復承務郎以誘說李允文之功
也張俊因奏若海為招討司幹辦公事上問輔臣始知
若海得罪之因乃曰若容在軍中恐為俊累後有罪者

亦必援例第勿許之朕自諭俊也

丙辰呂頤浩言先平內寇然後可以禦外侮今李成摧破李允文革面張用招安李敦仁已敗江淮惟張琪邵青兩寇非久必可蕩平惟閩中之寇不一又孔彥舟據鄂馬友據潭曹成李宏在湖南江西之間而鄧慶龔富剽掠南雄英韶諸郡賊兵多寡不等然閩中之寇最急廣東之寇次之蓋閩中去行在不遠二廣未經殘破若非疾速勦除為患不細詔樞密院措置朝請大夫傅

亮勒停雲安軍羈管亮既從張浚西行以夏國道梗不
果使浚俾知秦州又移遂寧府亮縱其從卒擾民浚罷
之亮頗缺望浚言於朝故有是命 宣義郎兩浙轉運
副使劉寧止直龍圖閣以寧止自言建炎勤王嘗典餉
事而賞典未及故也 翊衛大夫泉州觀察使神武後
軍統制陳思恭卒於江西江淮招討使張俊訟其勞特
贈遙郡一官賜其家帛三百

丁巳集英殿修撰提舉臨安府洞霄宮沈晦復徽猷閣

待制中奉大夫王羲叔復直徽猷閣羲叔嘗為戶部侍郎今復職已早非舊典也 是日金房鎮撫使王彥敗

李忠於秦郊店忠走降劉豫初曹端既為程千秋所殺

事見建炎三年十一月丁未 忠自稱京西南路副總管為端報仇擾

於京西漸犯金州謀入蜀遂申宣撫司乞下洋州關隘

照會張浚以為憂乃遣提舉一行事務閣門宣贊舍人

顏孝隆稟議官宣義郎蓋諒馳詣金州以慰撫為名探

賸其意且以黃敕除忠知高州兼永興軍路副總管孝

隆至軍中為所劫以狀白浚言忠實有兵二十餘萬諒
覘知白浚乞為備浚恐孝隆為忠所殺委利夔路制置
使王庶叔接忠入關仍散處其衆於梁洋境內庶檄忠
令解甲結隊而入忠去關二十里駐兵回翔月餘無解
甲意一夕殺孝隆遁去遂攻金州彥率兵禦之忠沉鷲
善戰其下多河北驍果官軍與戰輒不利一日彥遣兵
與忠戰於豐里令提舉官趙橫率統領官門璋駐於山
上為之策應彥乘高視之官軍少却彥麾橫救之不應

官軍遂敗彥退舍秦郊忠遂陷諸關彥令將士盡伏山
谷間偃旗幟焚積聚若將遁者募死士得千餘人設伏
以俟其至戰之前一日彥度忠長驅且入郡城夜半分
官軍為三以遏其衝凌晨賊果大至官軍逆戰聲震山
谷勝負未分俄伏騎張兩翼繞出忠大敗追襲至永興
軍之秦嶺會王庶遣偏將鹿晟馮賽來援賽由間道乘
之斬其將曹威等三人浚錄其功以彥為拱衛大夫溫
州觀察使賽初除隆德府路經畧使自盧氏從邵隆至

興元府故庶用之孝隆博州人後贈果州團練使

賽初建

炎三年八月乙酉晁公邁作王庶傳稱李孝忠為盜久求入關而日厯及王彥行狀張鈞續忠義錄皆作李忠

無孝字盖李孝忠又自是一人建炎初犯襄陽為王師所殺去此已久公邁實甚誤也

戊午觀文殿學士提舉臨安府洞霄宮范宗尹落職用侍御史沈與求奏也與求言宗尹罷相制麻止言沮格詔令恐後有議論者不知其端妄謂宰相與天子爭可否未為失職去年敵騎將欲北歸韓世忠於大江中流以舟師邀擊臣僚數請號召上流舟師相為應援宗尹

坐視不恤敵人果自上流乘風縱燎而世忠孤軍挫衄
及敵騎留屯天長六合之間趙立等嘗請乘暑合共擊
之宗尹以謂無事生事沮止其謀卒致立等相繼屠滅
罪一也宗尹充位一年畧無措置但將江東西湖南北
祖宗所定路分朝改暮易有同兒戲罪二也出帳盡賣
係官田宅使二百年安業之民怨怒紛起罪三也鬻爵
之令一切增價且如修武告鬻四萬五千緡朝廷以此
拋降糴本例須抑配設法罔民罪四也討論之事陛下

累諭不從卒致騰洶罪五也宗尹每事判呈實稟堂吏至有印押空名敕劄付之胥吏隨事書填賄賂公行罪六也劾議討論之初本欲假借此名拔援非類搢紳介冑之士皆謂宗尹背國從偽罪在十惡此宜大討論者罪七也士大夫守節不回者未嘗肯薦一人至欲雪吳玠莫儔徐秉哲等罪名引用顏博文輩罪八也曾慥指斥國家語言不順宗尹以慥係吳玠之壻面欺陛下除慥江西轉運判官罪九也宗尹與范瓊厚善寄居洪州

受其黃金百兩聞瓊之死居常恨之罪十也宗尹自知不協人望乃陰結閤門藍公佐內侍康誚刺探宮禁傳漏語言欲因希旨之言專為固寵之計罪十有一也宗尹蒞事一年身任宰相乃建議不厯知縣不除郎官監司蓋緣宗尹以迪功郎王居正改京秩除省郎恐後人援例遂塞其路既降指揮之後所除監司多非曾厯知縣之人舞文使事罪十有二也策試中書本求人望宗尹乃以吏職楊球者亦預召試罪十有三也京畿宣諭

雖三尺童子知其未可宗尹徒欲起復胡舜陟召寘從班故設此使命罪十有四也宗尹妻孥寄居洪州公受賄賂家問一至輒有差除如賊吏魏滂緣其門僧請託遂除監司又令使臣筆貼定價出賣差遣罪十有五也結卜相之士倡言於衆以謂朝廷若相宗尹四方盜賊自然衰息既而不驗復使王居正之徒為之說曰張邦昌奉迎太母宗尹有力陛下以此用之惑衆自媒罪十有六也晁公為妻取受求珍金銀使公為改換殺人公

事繁節減落刑名宗尹挾情庇之不肯根究至煩中批

放罷罪十有七也宗尹拜相之初即與何之辰改正舊

名繼得差遣罪十有八也顯黜言事之臣至謂投鼠忌

器罪十有九也

按七月癸亥宗尹罷相註沈與求條其大罪二十此尚缺一條俟考

望特

下臣章明正其罪庶為萬世之戒故有是命與求所謂

何之辰蓋何昌言也時以奉議郎調監全州酒稅於是

與曾慥皆罷

二人罷命在十月乙丑

顯謨閣待制新知嚴州李

擢徽猷閣待制新知温州席益並降充集英殿修撰以

沈與求論擢有罪而益任職日淺不當除待制故也

詔福建轉運司毋得齎牒所部州縣抑勒士民出助軍
錢物令提刑察之先是漕司以軍食費廣乃諭福州土
居陳義夫等願以一錢之產均出十錢因遣官徧諭下
四郡徽猷閣直學士知潭州綦寔禮言本州新經楊勅
侵擾之後已嘗均敷民間錢八萬緡不可再有科斂事
聞故有是命 承事郎蔡延世特進二官建昌軍進士
蔡益容補下州文學李敦仁之犯建昌也延世率民兵

捍賊敦仁敗去城以故得全

己未詔以江湖寇盜多貢賦不繼命戶部尚書孟庾領
江東西湖東等路宣諭制置使使理財治盜 尚書省
言近給賣新告價直高大變轉不行乞減敦武郎為三
萬緡承直郎為萬五千緡其餘以是為差仍不作進納
理為官戶免試注官從之

庚申初措置河南諸鎮屯田侍御史沈與求亦言今欲
因沿江荒閑之田募人屯耕用為籬落兼資儲餉此誠

計之得者乃陳屯田利害為古今集議上下二卷上詔

付戶部後亦未克行

附傳載此事於明年春恐誤今從日歷繫此按宋史繫已未日

勒停人張灝復朝散郎充徽猷閣待制提舉臨安府

洞霄宮灝孝純子靖康末為河東都轉運使坐失汾州

送雲安軍羈管至是悉復之

辛酉詔應四方有為謀策能還兩宮者實封以聞可行

有效當以王爵賞之翰林學士汪藻充龍圖閣直學

士知湖州

孫覲撰藻墓誌載藻知湖州仍領日曆事其寔謬誤能克小歷不深考又因而書之已辨

正修入詳見二年
十月庚辰並注

顯謨閣直學士致仕程汝文復為

翰林學士

學士院題名在今年三月
熊克小厯因之今從日厯

給事中胡交修

兼權直學士院

學士院題名在十月而日厯與藻汝文
除目同下蓋藻已罷而汝文未來自當

有權官係之
十月者誤也

尚書吏部侍郎黎確高衛並罷為徽猷

閣待制確知漳州衛知撫州徽猷閣直學士提舉江州

太平觀李彌大徽猷閣待制新知婺州李光並試吏部

侍郎吏部員外郎胡世將秘書省校書郎劉一止並

為監察御史一止首上疏論君子小人用否之辨以謂

天下之治衆君子成之不足一小人敗之有餘君子雖衆道則孤小人雖寡勢易蔓且是時朝廷將遣世將出使故擢用之 右文殿修撰新知宣州劉洪道復徽猷閣待制呂頤浩薦之也 名河南鎮撫使翟興所部軍曰忠護時興屯伊陽山寨餉道既絕上自武功大夫下至義兵日給糧二升而已至春艱食又或無支然其下無叛去者言者論其忠勤故錫佳名焉

壬戌遣監察御史胡世將督捕福建諸盜 吏部員外

郎廖剛言比江南探報事宜頗致懷慮臣謂周防津岸
申嚴斥埃在今日最為機要而鑿與或當順動預宜經
理自得報以來未聞朝廷措畫建康鄱陽勢未暇議自
會稽以南惟永嘉與福唐所當留意永嘉之險可恃與
否臣所不知如閩之四境南控大海三面皆崇山峻嶺
稍加人力不復可犯不得已至於幸閩則凡供億之事
必責它路致於海上而兵環駐於四境閩人無所困苦
斯可安矣願速令本路增修寨柵以備不時之巡盜雖

未息願賜曲赦因遣重臣往宣德音使潢池赤子得以
自新悉為我用剛所云江南探報未見當考然臣料今歲敵騎勢分
必無南渡之事望姑寬聖念以幸天下

癸亥以明堂禮畢命同知樞密院事富直柔恭謝越州
天慶觀温州守臣恭謝景靈宮

是秋金左副元帥宗維盡遷祁州居民以其城為元帥
府凡民之當遷者止許携籠篋其錢穀器用皆留之右
都監耶律伊都至和勒端城達錫林牙率餘衆北遁伊都

以食盡不克窮追而還時盜賊愈多宗維用大同尹高慶裔計令竊盜贓一錢以上皆死雲中有一人拾遺錢於市慶裔立斬之蕭慶知平陽府有行人拔葱於蔬圃亦斬之民知均死由是竊盜少衰而劫盜日盛慶裔又請諸路州郡置地牢深三丈分三隅死囚居其下徒流居其中笞杖居其上外起夾城圍以重塹宗維從而行之宗維患百姓南歸及四方姦細入境慶裔請禁諸路百姓不得擅離本貫欲出行則具人數行李以告五保

鄰人次百人長巷長次所司保明以申州府方給番漢
公據以行市肆驗之以鬻飲食客舍驗之以安止至則
繳之於官回則易之以還在路日限一舍違限若不告
而出者決沙袋二百仍不許全家出及告出而轉之他
處於是人行不以緩急動彌旬日始得就道且又甚有
所費小商細民坐困閭里莫能出入道路寂然幾無人
跡矣河東南路兵馬都總管蕭慶招降太行紅巾首領
齊寔武淵賈敢等送於宗維盡殺之於獄

建炎以來繫年要錄卷四十七

建炎以來繫年要錄卷四十七金人地名考證

伊都

原書作餘覩
誤改見卷一

和勒端

原書作曷董誤
改見卷四十三

達錫

原書作大石
誤改見卷一

古裕

原書作馮額
誤今改正

欽定四庫全書

建炎以來繫年要錄卷四十八

宋 李心傳 撰

紹興元年冬十月甲子朔龍圖閣待制知臨安府孫覲
提舉江州太平觀以集英殿修撰新知温州席益代之
覲不為呂頤浩秦檜所喜故引疾而有是命 責授單

州團練副使宋喚復朝請大夫喚庠曾孫

庠安陸人皇
祐中宰相

蔡攸妻弟也靖康初以徽猷閣待制為江淮發運副使

坐累責永州至是復官奉祠而言者以為罪戾昭著乃
罷予祠之命

乙丑詔曰黨錮之論自古病之本朝自章惇蔡京首建
元祐之黨至崇寧宣和間委任一相則天下人材不歸
蔡京則歸王黼之門矣恭聞太上內禪之日已自悔為
姦臣蒙蔽乃屬其大臣令輔淵聖盡用司馬光政事逮
朕嗣位以來遵用太上玉音追復元祐臣僚官職又錄
用其子孫亦欲破朋黨之論也方今國削而迫殊乏賢

能幹盡之士與共圖治而於推擇除授之際尚以蔡京
王黼門人為嫌似未通變自今應京黼門人寔有材能
者公舉而器使之庶幾人人自竭以濟艱難之運時呂
頤浩為政喜用材吏以其多出京黼之門恐為言者所
指乃白上下此詔焉 參知政事李回不為呂頤浩所
喜力丐免罷為資政殿學士江西安撫大使兼知洪州

回罷政日歷不載會要罷免門亦無之皆不可曉熊克
載於九月甲寅按日歷十月二日乙丑回與執政同加
恩尚帶參知政事銜四日丁卯方書回辭免江西新命
克甚誤也况朱勝非尚在江西未罷回何由便除洪州

樓鑰拜罷錄繫於乙丑
日蓋得其的今從之

給事中洪擬試吏部尚書

尚書右司員外郎趙子畫試太常少卿降授朝奉大夫
權江東安撫大使司參議官姚舜明考功員外郎仇愈
為左右司員外郎 朝散郎主管江州太平觀潘良貴
為考功員外郎朝奉郎主管臨安府洞霄宮樓焯為兵
部員外郎焯永康人秦檜所薦也 太常少卿蘇遲樞

密院檢詳諸房文字歐陽懋請補外皆命為徽猷閣待

制出守

懋初見建炎元年

言者以其非舊典爭之乃並改集英

殿修撰遲知處州懋知婺州

二人改命在是月丁丑

右武大夫

榮州團練使江南東路馬步軍副總管巨師古為神武

後軍統制

丙寅降觀文殿學士宣奉大夫江西安撫大使新知洪

州兼淮南宣撫使朱勝非為中大夫分司南京江州居

住時侍御史沈與求論勝非避事辭難且言馬進陷九

江由勝非赴鎮太緩故貶勝非以寄祿官分務不帶卿

監官中書失之也

勝非家傳云勝非嘗論鎮撫使處置乖方之狀又謂安撫大使名甚重而

寔不及一小邑上皆是之而當軸者不樂諷言者指其
逶迤之罪責官居住按呂頤浩初秉政與勝非無嫌又
勝非所論乃范宗尹時事
頤浩胡為不樂之今不取

詔自今諸郡守臣改移及
罪罷者並不俟新官先次罷任令轉運司選以次庶幹
官權行主管其帥臣則令監司權攝以言者奏罪罷之
人無所顧藉肆為不法故也 直顯謨閣江東轉運副

使王琮直秘閣福建轉運使朱宗並罷張邦昌之僭位
也二人自庶官擢為侍從至是用言者奏而斥之 初

命福建制置使辛企宗移屯福州

八月壬午

而企宗留南劍

州不進呂頤浩聞之是日下堂劄詰責企宗仍令斟量賊勢如不能措置即具以聞當別遣將會范汝為請屯福州就糧企宗懼得罪乃言初受命招捉盜賊已招捉過二十三萬餘人汝為元係謝嚮等統轄之人已令葉崇說諭赴軍前公參矣詔企宗係制置使毋得分彼此速往福州措置

丁卯詔直秘閣李允文就大理寺賜死坐擁兵跋扈擅權專殺也 集英殿修撰知嚴州柳約權尚書戶部侍

郎 詔朝請郎耿延禧復龍圖閣學士中書舍人程俱
言京城之陷咎由延禧父子專以和議阻天下勤王之
兵二聖未還艱危未濟而乃起自廢放盡還舊職何以
慰天下之公議詔延禧復徽猷閣待制提舉江州太平
觀 寶文閣直學士趙子櫟提舉萬壽觀 責授汝州
團練副使陳宥復昭宣使貴州防禦使提舉江州太平
觀以赦叙也初方臘之亂令中奉大夫張宛提點兩浙
刑獄挺身遁去詔貸死長流昌化軍至是已叙舊官復

以明堂恩還直秘閣言者奏其罪命乃寢寃武進人也
吏部言元祐黨籍及元符上書三等邪人渡江籍記
各已散失欲令逐家子孫各錄告勅于照自陳從之既
而直秘閣黃策以蔡京所書黨碑及國子監所刊印黨
籍上書人名來上詔付吏部

戊辰詔寶文閣待制新知廣州林通當苗劉之亂首請
納祿可除龍圖閣直學士以寵其節

日歷於戊辰丁丑
兩書之會要在十

四日丁丑蓋出詔
之日今從初旨

已巳登州防禦使權主管殿前司公事郭仲荀復護國軍承宣使侍親軍步軍都指揮使主管殿前司公事

中奉大夫盧襄復為太中大夫襄始坐事偽庭貶至是

盡復之

詔陳嗇之補迪功郎

嗇之未見

是日浙西安撫

大使司統制官王德以黃榜招安水軍統制邵青既而降之初青自鎮江引舟師駐于崇明鎮朝廷遣德往招捕德駐軍青龍鎮自率親兵往崇明而為泥港所隔青先遣人鋪板布釘籤官軍不知爭渡而過多死于泥中

青遙語德曰太尉後隔潮水我若以數百人棹舟扼守
津要則太尉糧食不通而自斃矣然豈可扼人於險太
尉其速歸德曰邵統制汝壯士盍歸朝廷乎青曰諾然
軍中不能不犯朝廷之法太尉可乞降一黃榜應以前
罪犯一切不問則與太尉同歸德許之折箭為誓言於
朝詔以青改過自新可依所乞日前罪犯特與赦免德
遣使持榜示青榜中有云官軍晝夜攻打青等城上乞
降青見之大怒其妻謂青曰汝不記作賊繫獄我剪髮

饋汝今既如此乃欲負朝廷耶時副統制從義郎單德忠等皆欲受招惟統轄官閻在不欲後數日諸將晨謁青德忠即擊殺在於坐謂衆曰敢有不歸朝廷者依此衆默然青聞之揮涕而出曰單統制若欲得印當好相付胡為乃爾德忠食塊自明然後勸青納兵以贖罪青

從之德忠即命倒旗鎗通款狀遂受招安

此據趙性之遺史修入但

姓之記持榜事于十月乙亥而日歷劉光世所奏狀乃云據邵青公文今月六日承樞密院黃榜則其日乃己巳也或是初六日黃榜到而十二日閻在為單德忠所殺遂定降計耳日歷九月丙辰降黃榜去己巳十四日

性之又云黃榜大槩言王德掩殺水賊邵青其勢困厄不欲廣殺乞降榜招降與史所載差不同今從日歷本語

庚午戶部尚書孟庾參知政事

王明清揮塵後錄云孟富文為戶部侍郎紹興

辛亥之歲邊遠少寧廟堂議乘隙削平諸路盜賊其方張者莫如范汝為乃以命韓世忠然病其難制或為州縣之害當選從官中有風力者一人置宣撫使世忠副之眾謂孟人物龐厚且嘗為韓所薦首遷本部尚書遣之又以為韓官已高亦非尚書所能令乃欲以為同簽樞上意已定時洪成季為禮部尚書呂丞相以孟除與成季參預之命同進上留擬狀值連日假告而已傳播初沈必先為侍御史嘗擊去成季至是沈召還舊列成季亦復為宗伯以呂丞相初拜未欲論也至是聞將大用亟奏成季罷去上意謂二相初拜薦二執政其一已

先擊去其一萬一又有議之者二相俱不安矣遂亟批出富文除參知政事蓋誤當成季所擬官二相亦恐紛紛不復申前說然亦議定俟閩中使遷即罷之而會逢多事居位獨久凡三年然後去國此尤謬誤按孟庾以今年九月自戶部除江湖宣諭使未嘗兼閩中亦不除韓世忠是時卒企宗已在建寧朝廷又遣胡世將督捕十月二日洪擬始自瑣闥遷吏書後五日庾即除參政又兩日擬以沈與求論罷此時擬方丐外安得云上已留參政擬狀數日也十一月五日庾除福建宣撫世忠副之其執政已彌月蓋方滋誤記而明清又因之今不取

禮部員外郎王居正乞補外不許先是侍御史沈

與求之論范宗尹也其言頗及居正故居正請外上謂

輔臣曰宗尹既去朕常諭止責萬格王侯二人餘不可

因宗尹進退卿等在廟堂且為朕力破黨與上因謂呂
頤浩曰劉光世與卿有故怨諸事略與應副頤浩具奏
致怨本末因言臣蒙聖恩再使備位宰相軀命不足惜
但觀近日事尤費力秦檜曰頤浩所謂費力者蓋恐小
人不悅事多掣肘耳上曰但問播紳公論小人何足卹
熊克小歷以居正為太常少卿按居正
明年二月方遷此時少常乃趙子畫也始與求再居言
路或疑其論范宗尹所引用者悉出之與求曰近世人
才以宰相出處為進退蓋習以成風今當別人之邪正

能否而公言之豈可謂一時所用皆不賢而使視宰相
為進退哉 建武軍節度使新知江州楊惟忠復為江
西馬步軍副都總管屯洪州武經大夫江西安撫大使
司統制官劉紹先知江州兼沿江安撫使時朱勝非在
江州紹先不之禮由是勝非恨之 詔進納授官人毋
得注令錄後又詔毋得注親民及理法官 初四川制
置使張深利夔路制置使王庶各以宣撫處置司之命
檄所部監司並受節制知夔州韓迪以其不便密聞於

朝詔張浚相度仍命施黔義兵毋得調往他路 徽猷閣直學士湯東野為江淮等路發運使代權邦彥赴行在 直龍圖閣知婺州傅崧卿試秘書少監 起復宣義郎知溧水縣高堯明叙宣教郎堯明侏子嘗為戶部員外郎靖康初停廢至是遂為邑非舊制也 保義郎漣水軍兵馬監押劉靖為閣門祇候 江東安撫大使司言李捧華旺已就招詔揀其兵隸諸將初張琪既遁捧等乃以所部就劉洪道招安尋以捧為武經大夫壽

春府兵馬鈐轄旺為池州兵馬都監既而洪道言捧所部精銳可得萬人捧狀貌偉健且勇於戰鬪雖語言鄙俚每合兵機又不矜能採用衆謀以得下情觀捧所長殆非庸將所及乃命神武前軍統制王瓌以捧衆赴行

在

十一月
戊申

壬申吏部尚書洪擬罷為龍圖閣直學士知温州擬初除尚書而侍御史沈與求言其未嘗歷州縣乃命出守內侍楊公恕嘗為康邸都監又從上在河朔至是以

舊思乞差遣三省欲與州都監上曰其人難使近民富
直柔曰近一任鈞者至密院干差遣陛下知其為人否
上曰鈞尤狠愎此曹稍不循理者不欲使之在左右遂
已熊克小歷載此事於八月壬申蓋誤 詔行在置宗正一司以武翼大
夫越州兵馬鈐轄趙仲蒸權行主管時內外宗司分寓
廣潮泉三郡上以行在宗子無統屬之人故有是命

敦武郎韓世良為閣門宣贊舍人世良世忠兄也 中
奉大夫新知梅州魏彥純為中書門下省都點檢文字

彥純彥明兄初自省吏出職至是呂頤浩復用之

甲戌尚書吏部員外郎廖剛守起居舍人剛在吏部時嘗言臣前所獻幸闕之說姑備一時之急爾國家艱難亦已云極今乃圖新之時故經營建康殆不可緩歲晚固所未暇俟有機會可乘當親擁六師往為固守之計彼敵雖黠詎能妄意吾之虛寔而輒窺也哉且東南建國無異金陵臣聞劉豫在齊魏間省徭薄賦招徠人士誘以偽官安知不圖吾根本地乎宜出其不意而徙居

焉亦先事制人之道也及為舍人又言陛下游意翰墨博覽羣書亦可謂之好學然帝王之學與文士異因援孟子所言天下之本在身與大學之道治國平天下其端在正心誠意願去末學之無益坐進此道則可以復羣生矣 秘閣修撰孫近為尚書戶部郎中近武進人也 直秘閣秦梓知台州

乙亥起復明州觀察使陝西諸路都統制秦鳳路經略使吳玠及金人戰于和尚原大敗之初金陝西都統羅

索死完顏宗弼遂會諸道及女真兵合數萬人謀入界
宣撫處置使張浚命玠先據鳳翔之和尚原以待之宗
弼造浮梁於寶雞縣渡渭攻原玠及其弟秦鳳兵馬都
鈐轄璘率統制官雷仲等選勁弓強弩與戰分番迭射
號駐隊矢接發不絕且繁密如雨敵稍却則以奇兵邀
擊斷其糧道凡三日是夜大破之俘馘首領及甲兵以
萬計宗弼中流矢二僅以身免得其麾蓋自入中原其
敗屢未嘗如此也於是浚承制以玠為鎮西軍節度使

璘康州團練使涇原路馬步軍副總管是役也玠所部
全軍轉五萬官資而朝請郎通判鳳翔府兼經略司主
管機宜文字陳遠猷亦遷左朝散大夫直秘閣秉義郎
閤門宣贊舍人王喜遷左武大夫威州刺史宣撫司統
領軍馬喜蒲城人靖康初金人破京師陝右大震喜聚
壯士十八人不旬日附者甚衆喜為立保伍法於常樂
鎮營建寨柵號王萬年王庶為節制使奉授成忠郎已
乃率所部歸玠用為秦州兵馬鈐轄改知同州至是

以奇功遂驟進始宗弼既趨江浙乃自淮南入陝西是
行也及韓世忠戰於大江劉錫戰于富平吳玠戰于和
尚原凡三戰而兩勝蓋世忠與錫失利至是宗弼為玠
所敗始自河東還燕山左副元帥宗維留宗弼在軍中
更以陝西副統薩里罕為陝西經略使將兵屯鳳翔府

與玠相持

王之望西事記曰吳玠以一軍見據和尚原
金人屢攻之不克大破金人殺其大帥人多

疑其不實夫吳玠之勝四太子之敗固未可知然金若
不敗則今無四川矣按和尚原之捷蜀賴以全張匯所
進節要亦備言之非無實也張浚行狀云尼瑪哈在陝
西病篤召諸大帥謂曰吾自入中國來未嘗有敢嬰吾

鋒者獨張樞密與我抗我在猶不能取爾曹宜悉此意務自保而已烏珠出而怒曰是謂我不能耶尼瑪哈死即合兵來攻按諸書此時尼瑪哈在雲中寔羅索死行狀誤也方玠之起師也檄河南

鎮撫司統制官董先董震自商號出師為牽制之策先引兵而出道遇金人數百徇洛上敗之遣使詣宣撫司伐其功欲得河東陝西經制使印且求餉其軍浚以問利夔路制置使王庶庶請使之攻敵以示信苟不聽吾絕之有詞先與敵戰則俱弊其來歸我易與也使人告先曰餽餉遠不可致輦金帛往矣誠能破女真宣撫司

無所愛先信服庶身出秦川殺傷敵相當其兵耗失多
無何天大雪先等乏絕歸取償於金州守將王彥訴其

狀庶遣二裨將行金州揚言興元兵至先遁去

此以是公邈所

作王庶傳及日歷中董震奏狀參修庶傳以為庶使人
言先攻敵而震奏以為准吳玠公文今兩存之庶不失

實

降授朝議大夫宋伯友復集英殿修撰伯友靖康

末知鄭州坐失守得罪至是始復之 權吏部員外郎

李元裕自湖南督上供綱泛海還行在是日至福州大

金灣為盜所殺

此據紹興三年三月二十二日元裕母
呂氏自訴狀增入狀云十月十二日在

大金灣乙亥十二
日也故附於此

戊寅定江昭慶軍節度使神武右軍都統制江淮招討
使張俊以凱還除太尉移屯婺州 武德大夫閣門宣
贊舍人江東安撫大使司統制官王進知池州代神武
後軍統制王瓌赴行在時進統所部在池陽故就用之
詔樞密院先因童貫陳請過指揮更不施行如有可
行事件令本院參酌取旨 初命兩浙安撫大使劉光
世宣撫淮南七州至是光世請鑄淮東宣撫使印置官

屬給錢糧增將吏時已賜揚楚等諸郡錢各二萬緡乃命鑄真揚通泰承楚州漣水軍宣撫使印餘皆許之光世復請用便宜指揮不許直秘閣河南鎮撫司營田官任直清言河南殘破民歸業者尚罕所勸營田全藉軍兵恐力微難以號令乞鎮撫使崔興兼營田使從之已卯翊衛大夫福州觀察使浙東馬步軍副總管兼溫台明州防邊事辛道宗罷兼職初道宗既出會浙東副總管楊可輔上書言時政辭旨切直罷之

此據趙姓富
之遺史

直柔因薦用道宗且初防遏司使領其事論者以為言
故省 秘閣修撰德安鎮撫使陳規以守禦功陞徽猷
閣待制而奉議郎觀察使權通判府事李忖亦加直秘
閣

庚辰資政殿學士提舉臨安府洞霄宮謝克家知泉州
江淮招討使張俊奏本軍幹辦官郝漸從軍有勞乞
除直秘閣既而言者以為職名非所以賞軍功乃進一

官為朝請郎

漸改命在二
年一月庚午

奉直大夫淮東營田副使

王實為淮南東路提點刑獄公事填復置闕 武顯大

夫閤門宣贊舍人知滁州寇宏知濠州武翼大夫知濠

州李玠為樞密院準備將領

日歷九月四日丁酉武功大夫知濠州李玠奏乞委

宣撫司捕王才十四日丁未武翼郎特差濠州兵馬都監李玠奏乞下宣撫司嚴責近限勦殺王才奉聖旨李玠除知濠州令專一措置所書前後抵牾皆不可曉又紹興二年正月癸丑江西安撫大使李回奏東南第六將闕乞差武翼大夫閤門宣贊舍人李玠此所云階官又與前兩奏不同今且用第三奏俟考初王才

據橫湖山寨遣將丁順圍濠州兩月不退權州事張德

患之宏時在鳳凰洲與德皆遣人詣宣撫使劉光世告

急光世遣統制官鄺瓊率本部攻橫澗山才急乃招順
歸寨順夜伏兵叢莽之中焚其營而去州人喜啓門爭
出順乘亂叩城城中出勁弓射之相持一餉間賊乃退
時官軍與賊皆乏矢悉破冢斲樞以為箭斡由是破伐
無遺德自以守城之功在宏之下乃以州印授宏宏不

辭德甚悔恨朝廷聞宏已在濠州故有是命

日歷宏玠除命于九

月丙辰十月庚辰兩書之而庚辰所書頗詳又趙姓之
遺史亦載此事於十月故附此但姓之以為朝廷授宏

敦武郎與日
歷不同蓋誤

欽定四庫全書

辛巳直秘閣提舉臨安府洞霄宮王暎提點江淮等路
坑冶鑄錢後半月復寢其命以言者論列也

壬午尚書省言近分撥神武右軍往婺州屯駐合用錢
理須樁辦緣行在至婺州不通水路難以津搬契勘便
錢之法自祖宗以來行於諸路公私為便比年有司奉
行不務經久致失信于民今來軍興調度與尋常事體
不同理當別行措置詔戶部印押見錢關子降付婺州
召人入中執關子赴杭越權貨務請錢每千搭十錢為

優潤有偽造者依川錢引抵罪東南會子法蓋張本于此
詔建州順陽村張毅特補保義郎用樞密院請也
毅受李芑招安屢與范汝為戰故官之 是日福建民

兵統領范汝為入建州汝為據建安衆十餘萬至造黃
紅傘等制置使卒企宗用兵連年卒不能制及是汝為
引兵入城守臣直秘閣王浚明以下皆遁賊遂舉其城
時承議郎葉斐權知甌寧縣為所拘即以斐權知州事

熊克小歷十二月建寇范汝為聞大軍將至亟入據州
城監司守宰以下皆遁去按日歷十一月十七日庚戌

知鉛山縣姚舜恭申范汝為以十月十九日據建州城
逐處守倖十九日壬午也十一月十九日戊戌始命孟
庾韓世忠克所云聞大軍將至亟入據
州城者恐誤今併附此更湏詳之也

甲申起復龍圖閣待制知興元府利夔路制置使王庶
陞徽猷閣直學士初庶以本路軍籍單寡乃籍興元府
興洋州諸邑及三泉縣強壯每兩丁取一三丁取二與
免戶下物力錢二百千號曰義士每五十人為一隊知
縣為軍正尉為軍副日閱武於縣月閱武于州不半年
有兵數萬每遇州教則厚犒賞之教閱有方可以出戰

則令尉皆改京秩張浚言於朝故有是命其後合興洋

三泉四郡義士至七萬餘人至今不廢

此以庶附傳呂大麟見聞錄及

晁公遡所作庶傳參修王之望西事記曰張浚以王庶帥興元制置利夔兩路付之軍士然官軍甚少所將以為用者皆招安之盜又團結民兵號為義士興元與洋旋得七萬人資妝旗鼓有類兒戲去年八月聞傳金將以陝西之衆數路大入南人震恐但營築山寨搬糧清野為避伏計耳按興洋義士可用西人類能言之望所云蓋休兵之後赦閱廢弛所致非庶時比也大麟所錄云庶於興元府興洋金蓮閣達諸處令州縣選強壯不半年有兵二十萬而公遡所作傳但云按興元武康順政興籍得丁之伉健者七萬餘人號義士二書復不同按金州此時乃王彥所統庶無由可制其民大麟亦誤也張浚奏狀稱庶勸誘興元府興洋州并三泉縣良

家子弟籍為義士今從之

直秘閣都大主管成都熙河五路茶馬

宣撫使司隨軍轉運使總領西川財賦趙開陞直顯謨

閣以張浚言其出賣茶引措置酒課增羨也時浚已用

便宜特授開直龍圖閣而朝廷不知故有是命

日歷二年四月

八日張浚奏趙開自建炎元年至今年秋措置酒課增羨已陞直龍圖閣蓋在朝廷降旨之前今附見此

金之圍慶陽也帥臣楊可昇固守不下張浚承旨授可

昇靜難軍承宣使言于朝朝廷疑可昇未落階官不許

據宣和詔旨楊可昇宣和末已為檀州團練使不知朝廷何以猶未知其落階官也然可昇後已

降敵或謂其詐降將有以報事泄遇害 宣議郎劉子

翼知建州子翼子羽弟也朝廷聞李芘病亟故改命之

子翼請降招安黃榜權住招軍蠲明年夏稅諸縣尉權

差武臣罷本州添差官審察縣令凡六事吏戶部看詳

除蠲稅不行及添差官許終任外餘從之

子翼所請以十一月丁酉

行下今併書之 朝散大夫直秘閣滕膺特除名興化軍編管

坐附會李允文也

紹興六年五月十三日量移人滕膺狀紹興元年六月二十一日蒙特旨

除名勒停送興化軍編管念膺昨任京西路轉運副使知州程昌寓於建炎四年正月內詐作被召離任臨行

擁兵恃強迫脅膺從軍及至漢陽密告撫諭馮康國及節制軍馬李允文申述昌寓棄城擁脅之狀李允文差幹官富誼前來體究其富誼却忠受昌寓金銀等物轉與為地其允文用便宜指揮差昌寓權知荆南府膺方獲脫身還本路偶因分鎮罷司見允文說及昌寓詐稱被召棄城不當復差知荆南允文恐膺陳訴上件因依逆勾抽送還兵級分刺諸軍及拘擁膺入城其允文安作等事悉不干預蒙刑部告示稱膺未勒停前係充鄂岳辰沅州鎮撫使李允文下參謀官念膺不曾充允文參謀官况允文下參謀從辟官許大年等已蒙錄用獨膺謫在遠方乞照赦除落過犯有旨特放逐便

乙酉同知樞密院事富直柔言祖宗時三衙用邊功戚里班行各一人盖有指意上曰參用戚里固祖宗法然

室礙處多恐不可用

丙戌武節大夫榮州團練使劉超知光州時超在公安

宣撫處置使司幹辦官劉光輔以詔書撫諭超聽命遂

以超守光州

王明清揮塵第三錄張默荊州遺事云乃公在荊州說孔彥舟平鍾相遂入蜀謁魏

公行至夔州又遇劇賊劉超者擁數萬衆欲往湖南劫掠張又以告彥舟之言告之且言太尉或肯從我當併往宣撫司言之超亦聽命駐軍于夔州不為擄掠之計後遇劉季高自蜀被召超朝持降書入奏朝廷大喜季高之進用由此而得之按日歷紹興四年閏四月二十

二日起自叙狀乃云劉光輔招安與默所記不合當考

按宋史 超行至黃州團風口為蘄黃鎮撫使孔彥舟

所襲其衆皆潰超與餘兵數百至蘄陽鎮彥舟復邀入
城奪其姬妾輜重然後遣超與光輔偕行小校趙進聚
衆走江州之瑞昌其徒漸盛 是晚行在越州火燔民
居甚衆

戊子斬有陰人崔紹祖于越州市其弟光祖配瓊州牢
城以偽造上皇手詔自稱大元帥故也

事祖見二月丙戌

詔

邵青以舟師赴行在 宣撫處置使張浚始聞熙河馬
步軍副總管劉惟輔死狀承制贈惟輔昭化軍節度使

賻銀帛布各二百匹兩官子孫十二人立廟於成州號

忠烈

此據宣撫
司崇牘

己丑升越州為紹興府以守臣陳汝錫有請也 斬修

職郎李雱于都市雱為李成軍正成敗為太湖令所獲

以獻至是誅之 錄唐宰相張九齡十二世孫昭為中

州文學 張琪自宣州遁去欲北降偽齊是日知承州

王林所遣總轄官閻門祇候張賽生擒之于楚州檻赴

行在

辛卯朝請郎知南康軍陳敏識為江南東路轉運判官
令與葉夢得計置錢糧時敏識猶未赴南康也

壬辰錄程頤孫將仕郎易為分寧令後五日又官其家
一人


癸巳范汝為遣兵犯邵武軍守臣朝散郎吳必明統制
官閣門宣贊舍人江西兵馬副都監李山率兵與戰衆

潰退保光澤縣山遂走信州

此據鉛山縣
所中修入

是月曹成引兵及馬友戰于潭州成敗去復還攸縣

偽齊劉豫遣其將王世冲以蕃漢兵寇廬州守臣王亨
以計誘世冲斬之大破其衆豫置招受司于宿州又以
其弟北京留守益為汴京留守知單州李儔知青州



建炎以來繫年要錄卷四十八

建炎以來繫年要錄卷四十八金人地名考證

羅索

原書作婁宿
誤改見卷一

薩里罕

原書作撒離曷
誤改見卷十一

烏珠

原書作兀木
誤改見卷一

尼瑪哈

原書作黏罕
誤改見卷一

--	--	--	--	--	--	--	--